

## DRUGI ZAVJET NA AKABI

### بيعة العقبة الثانية

Sljedeće godine (trinaeste godine po poslanstvu), iz Medine su krenuli karavani medinskih mušrika s ciljem obavljanja hadža. Među njima je bio sedamdeset jedan musliman od onih koji su primili islam i prisustvovali zavjetu na Akabi. Međutim, o tome niko ništa nije znao.

Kad su stigli u Meku, ovi muslimani su tajno stupili u kontakt s Poslanikom, s.a.v.s., i dogovorili se da se sastanu s njim u jednoj bajramskoj noći, u maloj dolini između brda, kod Džemretul-Akabe na Mini.

U noći, u kojoj je bilo dogovoreno da se sastanu s Poslanikom, s.a.v.s., ovi muslimani su legli u šatorima zajedno sa svojim narodom. Nakon prve trećine noći, oni su ustali i, provlačeći se između šatora, našli se s Muhammedom, s.a.v.s, na dogovorenom mjestu u dolini. Ukupno ih je bilo sedamdeset troje, od kojih dvije žene.

Tu su dali zavjet Poslaniku, s.a.v.s., i čvrsto obećanje da će se boriti za islam i braniti ga, i da će braniti i štiti Poslanika, s.a.v.s., od svakog onog ko pokuša da ga napadne, bio on Arap ili ne, kako bi Poslanik dostavio Allahovu, dž.š., vjeru.

Na kraju su upitali Poslanika, s.a.v.s.:

“Šta ćemo dobiti ako ispunimo ovo što smo obećali, o Allahov Poslaniče?”

On je odgovorio: “Džennet!”